

Шин, цевр, сарул гермүдт школмуд көдлмшән эклв

Нидн джил Приозерн рай- она кесг школмуд хуучн, дальджисн шавр гермүдт сургъулин джилән экллә. Арвн долан эклцин школ, бийдән ирлц гер уга билә.

Эн джил, ниднәкәр болхла ик ончта, байрта йовдл болджана. Района кесг школмуд шин, сарул гермүдт сургъулин джилән эклцхәв.

Чкаловин нергә совхоз зургъан эклцин школта. Ниднәгъә болхла, аргъта нег чигн школин гер уга бәәсмн. Ода эн совхозин тавн фермсәр, багъшир бәәдг өрәтә, шин школмуд тосхгддж, сургъулин джил эклтл белдгдв.

Совхозин директор ұр Лобачев Г.И. болн парторганизацин сегләтр Манджиев Ш. школин тосхлтд икәр оныган

болн килмджән өгсн учрар, эн совхозин сургъульчнр иим сәәхн, сарул школмудт сургъулян сурх зөвтә болцхав.

Болв зәрм совхозмудар школин тосхлтс хойр-гурвн джилдән кұцл уга бәәдг газр бас харгъна. Улгүрлхд, „Сарпа“, „Приозерный“, „Сухотинский“ совхозмудар школин гермүд эклж тосхгдад хойр джил болж йовна, ода бийнь тедн даруд дуусгдх темдг уга. Иим бәәдл, эн келгдджәх совхозмудин директормуд, школин тосхлтст оныган өгл уга бәәснә учр.

Школин тосхлтд бәәх дутудундиг өбрхн цагин эргцц уга кех кергтә.

Э. БУХАЕВ.